

no. 4
19

LETTRE

DE IACQUES

BON-HOMME PAYSAN
de Beauuoisis.

*A Messeigneurs les Princes retirez
de la Cour.*




A PARIS,

Iouxte la copie imprimeepar
JEAN BRUNET.

M. DC. XIV.

dup.
not cataloged



UNIVERSITY OF CALIFORNIA
SAN DIEGO
LIBRARY

3
L E T T R E

D E I A C Q V E S

B O N - H O M M E ,

Payfan de Beauuoisis.

A Messieurs les Princes retirez de la Cour.

MES TRES-HONOREZ SEIGNEURS
Le croy que vous auez tous quelques-fois ouïy parler de ce Iacques bon-homme qui ayant soubz le bon & noble Roy Iean, il ya bonne piece de temps, courageusement reprimé l'insolence de ces manges peuples, qui abusoient de sa patience donna nom à la Iacquerie. C'estoit le grãd pere de mon ayeul, duquel ie tiens encor au iourd'huy malgré la malice du temps, & l'auarice des chicaneurs, vingt cinq arpens de terre, & deux petits clos, que ie cultiue & fa-
çonne tous les iours de ma main, en ceste miene vieillesse de quatre vingt dix sept ans, aage que i'ay passé en mon petit mesnage aux champs, avec ma femme, mes deux fils & mes trois filles toutes mariees sans auoir iamais voulu changer de condition, n'y me
A ij

meller d'aucuns autres affaires, sinon vne
 fois que ie fus nommé par la commu-
 ne de nostre village, pour aller trouuer
 en vn chasteau prochain, quelques Gentils-
 hommes illec assemblez, en intention de
 courre sus à nostre bestail, en vengeance d'un
 de leurs leuriers que quelques vns de nos
 matins auoit mordu vn peu serré à la queue,
 parce qu'il s'enfuyoit. Ce que ie fis avec tât
 d'heur, que i'impetray d'eux, ce que tous
 ceux qui y auoient esté enuoyez auparauant
 n'auoient peu obtenir. Depuis on m'a tenu
 en ce quartier pour vn homme fort persuasif
 & propre à manier telles affaires. Cela faict
 que plusieurs gens de bien & amateurs de
 paix, estimant que ie pourrois auoir le mes-
 me pouuoir sur vous, mes trez honorez Sei-
 gneurs, m'ont quasi forcé de vous escrire sur
 les nouueaux bruits de ceste guerre, qui nous
 ont tellement effrayés en ce pays, que le gros
 Pineau, mon voisin à cause de son estable,
 (ne vous desplaise) qui ioint ma grange, iura
 dernièrement la teste Boeuf son serment des
 bonnes festes, que de ceste année il ne leme-
 roit auoine de peur d'engraisser les Cheuaux
 de ceux qui mangēt les poulles sans en con-
 ter les plumes, de crainte de les payer. Mes-
 chanceté si grande, qu'on dit que le Diable
 s'en fait des ailles pour s'eleuer en l'air quand

il a enuie de faire gresser sur les bleds. De sorte que quand la guerre n'apporteroit autre mal'heur que celuy la, i'estime que ceste seule consideration seroit capable de vous diuertir de la faire si vous en auiez quelque dessein. Mais ie ne me puis persuader, que tât que vous serés ceux que vous estes, c'est à dire ceux que vous deuez estre, la seule pensee vous en puisse seulement tomber en l'ame. I'ay cognu vos peres, & vos ayeulx quasi tous. C'estoient de tres braues Princes, & qui ont rendu de si grand tesmoignage de leur fidelité à nos Roys, & de leur affection à l'Estat, que c'est peché de presumer legèrement autre chose de leurs enfans; non moins heritiers de leurs vertus que de leurs biens: Car premieremēt quel proffit vous en pourroit il reuenir? les armees nes'entretiennent point de vent, il ne faut pas que la paye manque, autrement vous n'auiez ny Capitaine ny Soldats asseuré, a peine les receptes du Roy y peuuent elles fournir? vous trouueriez possible au commencement quelque credit es bourses d'Allemagne ou de Hollande, mais au bout il faudroit payer: & c'est lors qu'il cuit, car de croire que le traicté de paix se chargeast de tous ces frais, ie ne pense pas qu'õ le fist, on s'en est trouué mal autresfois: tout cela demeureroit sur vos coffres. Pour

le plaisir, hé mes tres honnorez Seigneurs, qu'il y a bien plus de contentemēt à ce promener dans les Tuilleries, à voler le Heron à S. Germain, à courre le cerf à Fontaine Bleau, à rompre la lance contre le faquin à la place Royale, à manger des œufs à la Portugaise au petit More, à ouyr la Musique douce de la Roynne Marguerite, qu'à boire la poussiere de la cāpagne, à porter la chaleur du midy sur le dos, à dormir armé sur l'affust d'un canon, à se leuer trois heures deuant le iour pour aller donner vne camifade, en dāger de laisser du poil, & à souffrir mille autres semblables incommoditez d'autant plus facheuses à personnes de vostre cōdition, que vous auez esté plus delicatement nourris entre toutes sortes de voluptez & passe-temps. Que s'il n'y a ny profit ny plaisir, encore moins d'honneur. Car quelle louange d'auoir troublé le repos & bon-heur du Royaume, durant la minorité de nostre ieuneroy. I'ay vn de mes filz qui est bon clerc, & chante au letrin, Ie me fais lire par fois les festes apres Vespres vn gros liure, que le deffunct Curé qu'il seruoit d'ordinaire à la Messe, luy donna par son testament: avec son chapeau des bonnes festes, ie ne sçaurois dire commēt il s'appelle, car il y manque six fueillets au commencement, mais ie près vn tel plaisir à ouyr

ce qu'il racôte que voicy la vingt troisieme fois que ie le repasse. De sorte que ie le sçay tantost quasi tout par cœur. C'est pourquoy i'en puis dire quelque chose. Or pour reuenir à mon propos i'y ay remarqué que tous ceux qui se sôt esleués cōtre l'autorité souveraine n'en ont iamais remporté que cōfusion, honte & reproche, de quelque pretexte qu'ils ayent sçeu colorer & delguiser leur intentions, i'ay ouy parler cent fois à mon pere de ceste leuee de bouclier que firent quelques Princes mal cōtens sous Loys vnziesme, il disoit que tous les sages de cerēps la les blamoient grandement, encore qu'ils n'eussent en la bouche que le bien public & le soulagement du peuple, qui pourtāt n'en amenda pas d'un sōls, par la paix de Conflans, ou il se trouua à la fuitte du Seigneur de Nantoüillet. Exemple que ie rapporte d'autant plus volontiers, que ie sçay qu'on dit vostre dessein tendre à la mesme fin, pour reformer les abus de l'Estat, & remettre toutes choses en leur ordre: Je louē vos resolutions, si elles ont ce but, car la Frâce a besoin de telles personnes que vous, en vn si important affaire, mais au nom de Dieu, prenez garde mes tres-honorez Seigneurs, que sans y penser, vous ne redies suspectes la sincerité de vos intentions par l'imprudence de vos

procedures. Nous auons vne si bonne, si vertueuse & si sage Royne qu'il sera fort mal aisé de persuader au peuple, que vous soyiez metiz d'un pur & vray desir de son bien, si vous separez vos Conseils, de ceux de sa Maïesté, & vous esloignez de ce Soleil du Louure sans la lumiere & l'influance, duquel rien de ce qui concerne le public ne peut auoir force n'y vigueur. C'est pourquoy, pardonnez à ma nayfue & grossiere liberté si ie vous dis, que vous n'avez pas esté bien conseillez en cest affaire. Car vous eussiez à ce que dit tout le monde, beaucoup mieux procédé, si vous eussiez vous mesmes d'un commun accord proposé de viure voix à Paris ce que vous avez depuis représenté par vne lettre enuoyee de Mezieres. Lieu la seule opportunité duquel a donné subject à beaucoup de gens mauuais interpretes de vos actions, de croire que vous vous resoluiez d'emporter par la force ce que vous vous desiez depouoir obtenir par la raison. Ceux qui vous cognoissent bien en ont iuge autrement, mais vous sçavez que le nombre des sages est tousiours le plus petit. Pour moy à qui la vieillesse a meury quelque peu le iugement dans l'experiance des choses passées ie n'en ay iamais eu opinion, comme i'ay desia dict cy dessus. Je pense bien à la verité que
l'affection

l'affection que vous auez tous au bien public vous pourroit exciter en l'esprit le desir de voir quelque reglemēt aux desordres de l'Estat, mais ie ne pense pas que vous estimiez que la guerre, source de toute confusion & desolatiō, soit vn moyen propre pour y pouruoir. Il me souuient de ce qui arriua l'an mil cinq cens trante trois, à Beauuais ou i'estois allé porter quelques pigeons à vèdre au marché. Quelques ieunes hommes ayāts pris vne assignation précise à trois heures, ainsi qu'on sçeut apres & nes'y pouuans trouuer si tost à cause d'vn autre affaire plus pressante qui leur estoit suruenue, s'en viennent au maistre qui gouernoit l'horloge, luy remonstre qu'il alloit trop tost d'vne heure, le priant de la retarder, ce qu'ayant refusé de faire ils en vindrent premierement aux iniures, & puis aux coups, si rudement qu'en s'entrebattant ils rompirent le balancier & vn poids de l'horloge qui en demeura plus de huit iours apres desbauché & detraqué. C'est pour monstrier que toute violence est ennemie de l'ordre & de la droite conduite des choses. Les moyens doux & gracieux sont tousiours les plus desirables & souuent les plus cōuenables. S'il y a quelque membre de l'Estat disloqué & desboité, faut-il pour cela mettre tout le corps à la gene, ou tre-

paner la teste : Si la gangrene commence à se former à vn orteil, faut il creuer les yeux, ou deschirer les entrailles à belles mains. Il y a peut estre, comme il y a tousiours eu, & y aura, quoy qu'on sçache faire, à l'aduenir, quelques abus en tous les ordres de ce Royaume, il ne se peut faire autrement, mais ils ne s'ont Dieu merci point si grâds qu'ils ne soiēt beaucoup plus supportables que les malheurs d'une guerre ciuile, Nous discourions dernièrement de ces matieres sous l'orme à la place, recherchant quels pouuoïēt estre ces desordres que vous prétēdiez de reformer. Il y en auoit qui disoient que vous vouliez faire que toutes les lieuës de France fussent esgales, que tous les clochers de Paris fussent à vn niveau, que les horloges y sonnassent tous à la fois, & autres choses semblables, iolies à la verité, mais non de telle importance que la vie d'un seul homme ne soit cent fois plus estimable & precieuse, car c'est l'image de Dieu. D'autres disoient que c'estoit que vous desiriez introduire vn seul poids, vne seule mesure, & vne seule coutume en tout le Royaume. Dont le premier pour ne rien dissimuler, me sembla iniuste tout à fait, car quelle apparence qu'un pauvre païsan de Bretagne ou de Prouence, vint mesurer à Paris vn minot de bled qu'il auroit acheté ou vendu? Cela est entierement hors

de raison. L'autre fort difficile, car chacun voudroit mouler ceste coustume sur son profit ou sa fantaisie. Les Normands voudroient qu'elle fust, qu'il fust permis à tout le monde de se desdire quand bon luy sembleroit. Les Gascons, qu'il fust loisible à quiconque a les mains souples de les jeter sur tout ce qui leur plaist en la maison d'autrui, & ainsi des autres prouinces de France. Le mesme aduiendroit és diuers Ordres dont cet Estat est composé. Le Clergé buteroit à ce que ses dismes s'estendissent generally sur toutes choses. La Noblesse, à ce que la bienséance luy fust vn tiltre légitime pour despouiller ses suiets de tout ce qu'il accômoderoit. Le tiers Estat, qu'il ne payast de taille que ce à quoy sa bonne volonté ou cômôdité le cotiseroit. Chaque particulier mesme en voudroit prescrire la forme. Lampau cousin second de ma femme disoit, qu'il souhaitteroit que ceste coustume fust, que les gens de ville fussent tenus de prédre des villageois les feuilles d'arbres pour nobles à la roze. Pour moy j'en faisois vne autre, qu'il ne fust permis à aucun suiet du Roy de quelque qualité qu'il fust, de faire leuee de gens de guerre pour quelque occasion que ce fust, sans la permission des sergents à cheual de Paris, deuement verifiée en toutes les com-

munautez & bourgades, où il y a brebis & vaches paissans l'herbe. Nous en deuissios de la façon, iusqu'à ce que nostre Greffier qui estoit reuenue le soir auparauant de la ville, nous assura que ce n'estoit rien de tout cela, mais que vous vous plaigniez entre autres choses du mauuais mesnage des finances, & de la corruption de la Iustice. A quoy il nous dit que nostre Reyne auoit si bien respondue, que ie croirois, que ce seroit crime de leze Maieité d'y vouloir rien adiouster. Il disoit de plus, que vous estiez offencez de vous voir postposez à trois ou quatre personnes de qualitez inferieure aux vostres. Si cela estoit, mes tres-honorez Seigneurs, vous auriez quelque raison de vous en piquer; mais i'ay beaucoup de peine à le croire, on scait trop bien l'honneur & le rang qui vous est deu. Que s'il arriue quelquefois au Conseil que vos opinions ne soient pas entierement suivies, ce n'est pas qu'on mesconnoisse ou mesprise vostre authorité; c'est que le poids des raisons ou le nombre des voix l'emporte. Les vieilles ges & les robbes loques s'ont d'ordinaire les plus forts sur le tapis, il ne faut pas s'en estonner. Tandis que vous vous musquez le matin, que vous visitez vos belles maisons aux champs, que vous renouellez vos terriers, que vous trauallez yn cheual, que vous courez la bague ils voyent les pieces, ils

balancent les affaires, escoutent les parties,
 & digerent leurs aduis. Je ne suis pas de la
 qualité des enfans du Seigneur de nostre vil-
 lage, mais quand leur pere me demãde quel-
 quefois mon opinion, touchant quelque
 chose de ma profession, comme il faisoit en-
 core auãt-hier sur le temps d'eslaguer quel-
 ques arbres, ie serois biẽ marry qu'il ne m'en
 creust aussi tost qu'eux, comme aussi faict-il
 le plus souuent. Pourquoi? c'est mon me-
 stier, & puis i'ay les cheueux blancs. On dict
 aussi que vous ne pouuez supporter de voir
 quelques vns esleuez dans peu de temps
 aux grandes dignitez par la faueur de leurs
 majestez. Mes tres-honorez Seigneurs, i'ay
 autrefois ouy dire en vn sermon, que les
 Roys sõt les Pasteurs de leurs peuples. N'est-
 il pas permis à vn berger de choyer vne de
 ses brebis plus que les autres s'il veut? l'en-
 auois autrefois vne estãt ieune, que i'aymois
 tellement entre quarante que ie gardois,
 que i'eusse volontiers partagé mon bon saye
 avec elle pour la couvrir en hyuer si elle eust
 eu froid. Je l'appellois la Bine: Ce n'est pas
 qu'elle fut belle ny bonne, car elle estoit es-
 cloppee de la morsure d'vn loup, & outre
 cela brehaigne; mais c'estoit quelque affe-
 ction particuliere dont i'eusse esté bien em-
 peché de dire la cause. Aussi ne pẽsois ie pas
 estre tenu d'en rendre compte à personne

Vous demandez pareillement, nous diët le
 Greffier, que le peuple soit soulagé, vous
 nous obligez à la verité par le soing que vous
 auez de nous, car nous auons vn peu trop
 de charge, mais non pas tant Dieu mercy
 neantmoins que nous n'en ayons autresfois
 porté d'auantage, & que nous n'aymions
 cent fois mieux la porter encore trente ans,
 que d'endurer trois mois de guerre. S'il n'y
 a pas d'autre remede que celuy là, laissons le
 Monstier ou il est. Nous esperons que la bõ-
 té du Roy & de la Reyne sa mère y pour-
 uoira avec le temps. C'est pourquoy il ne
 faut pas que vous vous imaginiez d'attirer
 par ceste amorce aucun de nous pour gros-
 sir vos troupes, nous n'en voulons point
 manger à ce prix là. Il n'y a paix qu'elle
 quelle soit, qui ne vaille mieux qu'une guer-
 re. Si les mains de mangent à quelques vns qui
 sont à l'entour de vous, qu'ils les aillent frot-
 ter contre les murailles de Constantino-
 ple, ou gratter aux moustaches du Sophi,
 iusqu'à ce que le sang en sorte. Mes tres-ho-
 norez Seigneurs, vous estes François, & auez
 plus que tous autres interest à la cõseruation
 de ceste Monarchie. Prenez donc garde, s'il
 vous plaist, que vous ne la iettiez en quelques
 troubles & diuisions domestiques qui la puis-
 sent perdre. Elle ne craint rien que du dedãs,
 tant que nous y serons en bonne intelligẽce,

nous nous trouuerons inuincibles au dehors
il faudra que tout le reste du monde nous ce-
de. l'ay autresfois ouy vn Prescheur qui di-
soit, que quand le Diable eust offert à no-
stre Seigneur sur le pinacle du Temple, tous
les Royaumes de la terre, il en fut par apres
fort rancé par sa femme: Car qu'eusses-t'il
fait, luy disoit-elle, s'il t'eust pris au mot? Il luy
respondit: Ne sçais-tu pas qu'un mary ne peut
disposer du bien de sa femme, & que tu m'as
apporté la France en dot? (Car en ce temps
là elle n'estoit pas encore Chrestienne) or ie
suis tres-certain que d'as trois ans i'auray si ie
veux, reconquis le reste de la terre: pourueu
que i'aye ce Royaume entier à ma deuotion.
Ie pense qu'il disoit vray ceste fois là: Con-
feruons donc nos forces pour les employer
en quelque bonne occasion contre les mes-
creans ainsi que faisoit nostre bon S. Louys:
Attendant que le suiet s'en presente, re-
tourne mes tres-honorez Seigneurs, vous
serez les mieux venus que iamais. Il y a plus
de plaisir cent fois à Paris qu'à Meziere s ny à
Soissons. C'est là où vous estes à vostre iour
& où vous paroissiez vrayement ce que vous
estes: Vostre absence vous faict tort, & non
moins à la France. Car combien pensez vous
qu'elle ait osté de lustre à ceste derniere foire
de saint Germain? Il n'y anoit quasi person-
ne: De sorte qu'il y aura des estrangers qui

rapporteront en leur païs que ce n'est pas de
 la Cour de France ce qu'on en dict. D'où
 il est à craindre qu'il ne naïsse en leurs cœurs
 quelque mespris qui les excite à entrepren-
 dre plus legerement sur nous à l'aduenir. Cō-
 sideration qui n'est pas petite, si elle est bien
 prise: Encore vne fois retournés au nom de
 Dieu, mes tres-honorez Seigneurs, & cou-
 pez sagement chemin aux diuisions & mal-
 heurs que vostre esloignement pourroit à la
 fin engendrer. Que si vous estes resolu à la
 guerre, ce que ie ne pense pas & souhaite
 encore moins: Octroyez-moy s'il vous plaist
 en recognoissance de la peine que ie prends
 à vous remontrer (excusez-moy, si i'vise de ce
 mot) vne sauuegarde pour toute ma famille
 & pour le bon Goubau qui m'a aydē à com-
 poser ceste lettre; car ie craignoy qu'il ne
 m'eschappast quelque mot du païs qui vous
 fit rire de mes 97. ans, c'est pourquoy i'ay
 eu en cela besoin de luy, qui a autrefois esté
 Secrétaire de saint Innocent. Je prie Dieu,
 mes tres-honorez Seigneurs, qu'il vous ins-
 pire vn bon & salutaire conseil, & vous don-
 ne bonne & longue vie. De nostre Village
 ce 28. Mars, durant la trefue des cloches,
 avec les oreilles des malades.

Vostre tres-humble seruiteur
 IACQUES BON-HOMME.